



**ՀԱՆՈՒՆ ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՍԱՀՄԱՆԱԴՐԱԿԱՆ ԴԱՏԱՐԱՆԻ
ՈՐՈՇՈՒՄԸ**

«ԵՎՐԱՍԻԱԿԱՆ ՏՆՏԵՍԱԿԱՆ ՄԻՈՒԹՅԱՆ ԵՎ ՆՐԱ ԱՆԴԱՄ ՊԵՏՈՒԹՅՈՒՆՆԵՐԻ, ՄԻ ԿՈՂՄԻՑ, ԵՎ ՍԻՆԳԱՊՈՒՐԻ ՀԱՆՐԱՊԵՏՈՒԹՅԱՆ, ՄՅՈՒՍ ԿՈՂՄԻՑ, ՄԻՋԵՎ ՀԱՄԱՊԱՐՓԱԿ ՏՆՏԵՍԱԿԱՆ ՀԱՄԱԳՈՐԾԱԿՑՈՒԹՅԱՆ ՄԱՍԻՆ» ՇՐՋԱՆԱԿԱՅԻՆ ՀԱՄԱՁԱՅՆԱԳՐՈՒՄ ԱՄՐԱԳՐՎԱԾ ՊԱՐՏԱՎՈՐՈՒԹՅՈՒՆՆԵՐԻ՝ ՍԱՀՄԱՆԱԴՐՈՒԹՅԱՆԸ ՀԱՄԱՊԱՏԱՍԽԱՆՈՒԹՅԱՆ ՀԱՐՑԸ ՈՐՈՇԵԼՈՒ ՎԵՐԱԲԵՐՅԱԼ ԳՈՐԾՈՎ

Քաղ. Երևան

15 մարտի 2022թ.

Սահմանադրական դատարանը՝ կազմով. Ա. Դիլանյանի (նախագահող), Վ. Գրիգորյանի, Հ. Թովմասյանի, Ա. Թունյանի, Ա. Խաչատրյանի, Ե. Խունդկարյանի, Է. Շաթիրյանի, Ա. Պետրոսյանի, Ա. Վաղարշյանի,

մասնակցությամբ (գրավոր ընթացակարգի շրջանակներում)՝

ՀՀ կառավարության ներկայացուցիչ՝ ՀՀ էկոնոմիկայի նախարար Վ. Քերոբյանի, համաձայն Հայաստանի Հանրապետության Սահմանադրության 168-րդ հոդվածի 3-րդ կետի, 169-րդ հոդվածի 3-րդ մասի, «Սահմանադրական դատարանի մասին» ՀՀ սահմանադրական օրենքի 23, 40 և 74-րդ հոդվածների,

դռնբաց նիստում գրավոր ընթացակարգով քննեց՝ «Եվրասիական տնտեսական միության և նրա անդամ պետությունների, մի կողմից, և Սինգապուրի Հանրապետության, մյուս կողմից, միջև համապարփակ տնտեսական համագործակցության մասին» շրջանակային համաձայնագրում ամրագրված պարտավորությունների՝ Սահմանադրությանը համապատասխանության հարցը որոշելու վերաբերյալ» գործը:

ՀՀ կառավարությունն իր՝ 2022 թվականի հունվարի 5-ի N 2-Ա որոշմամբ հավանություն է տվել 2019 թվականի հոկտեմբերի 1-ին Երևանում ստորագրված «Եվրասիական տնտեսական միության և նրա անդամ պետությունների, մի կողմից, և Սինգապուրի Հանրապետության, մյուս կողմից, միջև համապարփակ տնտեսական համագործակցության մասին» շրջանակային համաձայնագիրը վավերացնելու մասին» օրենքի նախագծի վերաբերյալ Հայաստանի Հանրապետության կառավարության օրենսդրական նախաձեռնությանը և որոշել է այդ համաձայնագրում ամրագրված պարտավորությունների՝ Սահմանադրությանը համապատասխանությունը որոշելու նպատակով դիմել Սահմանադրական դատարան:

Գործի քննության առիթը Կառավարության՝ 2022 թվականի հունվարի 14-ին Սահմանադրական դատարան մուտքագրված դիմումն է:

Ուսումնասիրելով վերոնշյալ շրջանակային համաձայնագիրը, սույն գործով Կառավարության ներկայացուցչի գրավոր բացատրությունը և գործում առկա մյուս փաստաթղթերը՝ Սահմանադրական դատարանը **Պ Ա Ր Ձ Ե Ց**.

1. «Եվրասիական տնտեսական միության և նրա անդամ պետությունների, մի կողմից, և Սինգապուրի Հանրապետության, մյուս կողմից, միջև համապարփակ տնտեսական համագործակցության մասին» շրջանակային համաձայնագիրը (այսուհետ՝ Շրջանակային համաձայնագիր) ստորագրվել է 2019 թվականի հոկտեմբերի 1-ին Երևանում՝ Եվրասիական տնտեսական միության և նրա անդամ պետությունների՝ Հայաստանի Հանրապետության, Բելառուսի Հանրապետության, Ղազախստանի Հանրապետության, Ղրղզստանի Հանրապետության, Ռուսաստանի Դաշնության, մի կողմից, և Սինգապուրի Հանրապետության, մյուս կողմից, միջև փոխադարձ հետաքրքրություն ներկայացնող բնագավառներում Կողմերի միջև փոխադարձ առևտրային կապերի զարգացման և տնտեսական համագործակցության խրախուսման համար բարենպաստ միջավայր և պայմաններ ստեղծելու նպատակով:

2. Շրջանակային համաձայնագիրն ուժի մեջ է մտնում այն օրվան հաջորդող երկրորդ ամսվա առաջին օրը, երբ Կողմերը փոխանակում են գրավոր ծանուցումներ,

որոնցով հավաստում են, որ կատարել են Շրջանակային համաձայնագրի ուժի մեջ մտնելու համար անհրաժեշտ համապատասխան ներքին իրավական ընթացակարգերը: Այդպիսի ծանուցումները կատարվում են Եվրասիական տնտեսական հանձնաժողովի և Սինգապուրի Հանրապետության միջև (հոդվ. 2.2):

3. Շրջանակային համաձայնագրի նպատակն է ստեղծել Եվրասիական տնտեսական միության և նրա անդամ պետությունների, մի կողմից, և Սինգապուրի միջև, մյուս կողմից, համապարփակ տնտեսական համագործակցության համար շրջանակ՝ Եվրասիական տնտեսական միության և նրա անդամ պետությունների, մի կողմից, և Սինգապուրի Հանրապետության միջև, մյուս կողմից, տնտեսական և առևտրային հարաբերությունների, ինչպես նաև Եվրասիական տնտեսական միության անդամ պետությունների և Սինգապուրի Հանրապետության միջև ներդրումային համագործակցության ամրապնդման և ընդլայնման միջոցով, և Եվրասիական տնտեսական միության և նրա անդամ պետությունների, մի կողմից, և Սինգապուրի Հանրապետության միջև, մյուս կողմից, ապրանքների առևտրի և Եվրասիական տնտեսական միության անդամ պետությունների և Սինգապուրի Հանրապետության միջև ծառայությունների առևտրի ազատականացման և դյուրացման միջոցով, ինչպես նաև Եվրասիական տնտեսական միության անդամ պետությունների և Սինգապուրի Հանրապետության միջև թափանցիկ, ազատական և խթանող ներդրումային ռեժիմի ստեղծման միջոցով (հոդվ. 1.1):

4. Հայաստանի Հանրապետությունը, փոխադարձության հիման վրա, Շրջանակային համաձայնագրով ստանձնում է, մասնավորապես, հետևյալ պարտավորությունները.

4.1. Սինգապուրի Հանրապետության հարցմամբ՝ գրավոր հարցումը ստանալուց հետո երեսուն (30) օրվա ընթացքում, հայցող Կողմի տարածքում, եթե Կողմերն այլ բանի վերաբերյալ չեն պայմանավորվել, Եվրասիական տնտեսական միության անդամ պետությունների հետ համատեղ՝ առևտրի համար պատասխանատու նախարարների մակարդակով, անցկացնել խորհրդատվություններ՝ Շրջանակային համաձայնագրի 1.3-րդ հոդվածի (Կարգավորման շրջանակը և հարաբերակցությունը այլ համաձայնագրերի հետ) 1-ին կետում նշված համաձայնագրերից ցանկացածի գործողության դադարեցման, Եվրասիա-

կան տնտեսական միության մասին պայմանագրին համապատասխան՝ Եվրասիական տնտեսական միության նոր անդամ պետության միացման, Եվրասիական տնտեսական միության մասին պայմանագրին համապատասխան Եվրասիական տնտեսական միությունից Եվրասիական տնտեսական միության անդամ պետության դուրս գալու, կամ Կողմերի փոխադարձ պայմանավորվածությամբ ցանկացած այլ հարցերի վերաբերյալ (հոդվ. 1.4, կետեր 1 և 2),

4.2. Շրջանակային համաձայնագրի 1.4-րդ հոդվածի 1-ին կետում նշված խորհրդատվությունների ընթացքում, հաշվի առնելով ցանկացած համապատասխան գործոնները, ի թիվս այլնի, ուսումնասիրել՝ արդյո՞ք Շրջանակային համաձայնագրի նպատակներն իրականացվել են, թե ոչ, և արդյո՞ք անհրաժեշտություն կա փոփոխություններ կատարել Շրջանակային համաձայնագրում և դրա 1.3-րդ հոդվածի (Կարգավորման շրջանակը և հարաբերակցությունը այլ համաձայնագրերի հետ) 1-ին կետում նշված համաձայնագրերի մեջ (հոդվ. 1.4, կետ 3) և այլն:

5. Սահմանադրական դատարանն արձանագրում է, որ Շրջանակային համաձայնագրին Եվրասիական տնտեսական միությանը նոր անդամ պետության միանալու հարցը բանակցվում է Եվրասիական տնտեսական միության, նրա անդամ պետությունների, ներառյալ՝ Եվրասիական տնտեսական միության այդ նոր անդամ պետության, և Սինգապուրի Հանրապետության միջև: Նման միացումը իրականացվում է Շրջանակային Համաձայնագրի լրացուցիչ արձանագրության կնքման միջոցով (հոդվ. 2.3, կետ 1):

6. Սահմանադրական դատարանը նաև արձանագրում է, որ Հայաստանի Հանրապետությունը Եվրասիական տնտեսական միությանը անդամակցում է 2014 թվականի հոկտեմբերի 10-ին ստորագրված՝ «Հայաստանի Հանրապետության՝ «Եվրասիական տնտեսական միության մասին» 2014 թվականի մայիսի 29-ի պայմանագրին միանալու մասին» պայմանագրով, որը վավերացվել է Ազգային ժողովի 2014 թվականի դեկտեմբերի 4-ի՝ ԱԺՈ-132-Ն որոշմամբ: Միաժամանակ, Շրջանակային համաձայնագրում հղում է կատարվում «Հայաստանի Հանրապետության և Սինգապուրի Հանրապետության միջև Ծառայությունների առևտրի և ներդրումների մասին» 2019 թվականի հոկտեմբերի 1-ի

համաձայնագրին, որը Հայաստանի Հանրապետության կողմից վավերացվել է 2020 թվականի մայիսի 19-ին՝ Հանրապետության նախագահի կողմից ստորագրված ՀՕ-259-Ն օրենքով:

7. Սահմանադրական դատարանը գտնում է, որ Շրջանակային համաձայնագրով Եվրասիական տնտեսական միության և նրա անդամ պետությունների, մի կողմից, և Սինգապուրի Հանրապետության, մյուս կողմից, միջև համապարփակ տնտեսական համագործակցության գործում Հայաստանի Հանրապետության ստանձնած պարտավորությունները համահունչ են Սահմանադրության 13-րդ հոդվածով ամրագրված՝ միջազգային իրավունքի հիման վրա Եվրասիական տնտեսական միության մյուս անդամ պետությունների և Սինգապուրի Հանրապետության հետ բարիդրացիական, փոխշահավետ հարաբերությունների հաստատմանն ուղղված՝ արտաքին քաղաքականության իրականացման նպատակին:

Ելնելով գործի քննության արդյունքներից և ղեկավարվելով Սահմանադրության 168-րդ հոդվածի 3-րդ կետով, 170-րդ հոդվածի 1-ին և 4-րդ մասերով, «Սահմանադրական դատարանի մասին» սահմանադրական օրենքի 63, 64 և 74-րդ հոդվածներով՝ Սահմանադրական դատարանը **Ո Ր Ո Շ Ե Ց**.

1. «Եվրասիական տնտեսական միության և նրա անդամ պետությունների, մի կողմից, և Սինգապուրի Հանրապետության, մյուս կողմից, միջև համապարփակ տնտեսական համագործակցության մասին» շրջանակային համաձայնագրում ամրագրված պարտավորությունները համապատասխանում են Սահմանադրությանը:

2. Սահմանադրության 170-րդ հոդվածի 2-րդ մասի համաձայն՝ սույն որոշումը վերջնական է և ուժի մեջ է մտնում հրապարակման պահից:

ՆԱԽԱԳԱՀՈՂ

15 մարտի 2022 թվականի
ՍԴՈ-1638



Ա. ԴԻԼԱՆՅԱՆ